



Minggu, 11 April 2021

Ogen: Jeremia 51:54-58



La Lit Si Tetap



Babilon sada bangsa si megegeh tupung masa Jeremia erdahin jadi sekalak nabi i negeri Juda (Israel Selatan). Ia me ndube iteruh kuasa Raja Nebukatnesar nerang Juda, ngeruntuhkan tembok Jerusalem ras ngeruntuhkan Rumah Pertoton si pajekken Raja Salomo.

I bas ogenta sendah ia si megegeh ndube, nandangi runtuh bagi peruntuhna ndube Jerusalem. Nina TUHAN, Tembok-tembok Babilon si enteguh la banci la radas ras taneh, janah menara pintu-pintu gerbang si meganjang pe meseng. Kerina pendahin bangsa-bangsa la kap lit ertina, kerina kelatihenna kempak api kap perlawesna. Aku kap TUHAN si Mada Kuasa si ngerana enda." Si reh nerang ia eme bangsa Asyur, italukenna Babil janah Babil iteruh kuasa Asyur.

Bage me kepe kehebaten i doni enda. Pernah ituriken pemasmur 37:35-36 *Pernah kuidah kalak jahat si megombang, ia erkuasa desken batang cemara Libanon. Tapi dungna tupung aku mentas ka arah e, kudarami ia, tapi la aku jumpa.* Bage kal nge kepe ngenca kehebaten manusia. Jabaten, kuasa, erta, gelar si mehaga. La banci enda penalemennta, la banci enda si agahken i bas geluhta. Kerina si e sada pe la tahan. Kerina ermasa-masa. Emaka si tuhuna si pentingna kal man banta eme ndateken kai si tahan rasa lalap. Kai si la ermasap-masap. Janah si e sada ngenca jababna eme ernalem man Dibata si tuhu-tuhu. Dibata ngenca la pernah salih nai, genduari seh rasa lalap. Erdandanken si e mari ernalem man Dibata si la pernah salih keleng ate, kuasa ras kesetianNa.

Ernalemlah Man Si La Pernah Salih